

# Santiklausväsli

Es dunklet scho im Tannewald,  
es schneielet ganz liesli.  
Was isch das für es Liechtli dört,  
in sällem kleine Hüsli?  
Dört isch dr Santiklaus deheim,  
mit sine guete Sache,  
är het scho's Lämppli azündet  
und tuet grad Kafi mache.  
Är schribt ins grosse digge Buech,  
was jedes Kind so mache tuet.  
Do pöbberlet's ans Lädeli  
Und s'Glöggli g'hört är lüüte,  
jetzt weiss är scho, wär dusse isch  
und was das söll bedüüte:  
Dr Schmutzli kunnt no z'Obe spot  
und het ihn welle stupfe.  
Är müess dr Sack bald füre näh  
Und sini rote Stiefel lupfe.  
Es dungglet spot im Tannewald  
Es schneielet ganz lisli.  
Do legt dr Klaus si Mantel a  
Und bschliesst si kleins Hüsli.